



Inissialiortitserneq pisortat tapiissutaasa qanoq agguarneqarnissaannik ineqarnerlu pillugu aaqqissuusseqqinnissaq qanoq ittoq Naalakkersuisut Inatsisartunilu ilaasorta qanoq isumaliutersuuteqarpat?

(Inatsisartunut Ilaasorta Ane Hansen, Inuit Aqatigiit)

Inatsisartunut ilaasortap, Ane Hansenip apeqquteqaat aallaavigalugu inissialiortitserneq pillugu pisortat tapiissutaasa qanoq agguarneqarnissaat ineqarnerlu pillugu aaqqissuusseqqinnissaq pillugu siunnersuutaa imannak oqaaseqarfigissuarput.

Partii Naleqqamiit ukiorli ineqarneq pillugu Naalakkersuisunut apeqquteqaateqartarnitsinni ineqarnermut tunngasut inuiqatigiinni oqallinnerit annertuut sammineqalerput. Allaallumi apeqquterpassuit ilaatigut imaaliannaarlugit paasisassarinnngisaraluagut qujanartumik saqqummiussuunneqarput.

Aamma qularnanngilaq taama Naalakkersuisunut apeqquteqarneq inuiaqatigiinni eqiiallatsitsisimassasoq.

Aamma qujanaqaaq Inatsisartunut Ilaasorta Ane Hansen oqallisissiamik matuminnga saqqummiussaqqarmat.

Tassami Partii Naleqqamiit aamma assut soqutigaarput, inuiaqatigiinni ineqarnikkut aaqqissuussaanerup sukumiisumik oqallisigineqarlunilu pissutsinut piviusunut naapertuuttumik iluarsartuunneqarnissaa.

Taamaammat aamma ukioq manna aprilimi Naalakkersuisut ineqarneq pillugu isumasioqatigiisitsinissamik nalunaaruteqarmata naatsorsuutigisimagaluarparput, susassaqqartut assigiinngitsut peqataatinneqarnerunissaat.

Tassami ineqartut peqatigiiffiiniilluunniit peqataatitsisoqanngilaq, sanaartortut sinniisaat peqataatinneqanngillat.

Pingaarnertut Danmarkimiit oqaluttuukkiartorneqarpugut ineqarnermut tunngasut siunissami qanoq iliuuseqarfigninnaagivut?

Sooruna maani nunatsinni pissutsinik piviusunik ilisimasalittavut annerusumik atorumaneqanngitsut?

Naalakkersuisut inissianik sanaartornermut pilersaarutaat qivaraanni, aattaallimi “kukkukkuuaqqanut” (Naalakkersuisut aprilimi ineqarneq pillugu isumasioqatigiisitsinermi oqaatigisaattuut) inissiat mikisut aattaat iluamik sanaartorniarneqarput.

Tamatta nalunngilluinnarparput inissaaleqineq annertoorujussuusoq aamma inissiarpassuit aserfallassimaqisut, ilarpassuulu matooraannarneqarsimasut.

Ukioq Partii Naleqqamiit Naalakkersuisunut apeqquteqarnitsinni ilisimatinneqarpugut;

Inuit ilaqutariillu AS INI-miit 398-it, Iserit A/S-imiillu ilaqutariit 26-t taamanikkut anisitaasussatut nalunaarsorneqarsimasut

taakkualu saniatigut 2014-imi inuit ilaqutariillu katillugit A/S INI-miit 139-t anisitaareersimasut aamma inissiaatileqatigiiffik Iserit A/S-imiit piffissami 2006-2014-imut inuit ilaqutariillu katillugit 194-it anisitaareersimasut.

Taamaammat aamma Partii Naleqqamiit ukioq-mannamut aningaasanut inatsisit siullermeerneqarnerani aappassanneerneqarneranilu, ineqarnermut tunngasut maannakkorpiaq inuppassuarnik ilaqutariippassuarnullu ernumanartorsiortitsisut pillugit, minnerunngitsumillu sulisitsisut peqatigiiffiata NUSUKAP piumasaqaateqarnera naapertorlugu immikkut ittumik ineqarnermut iluarsartuussinissamut 50 million koruuninik aningaasaliisoqassasoq siunnersuutingaarput, kisianni tassa maannamut ajorluinnaraluartumik Naalakkersuisut inuit qulaani ajornartorsiortup pillugit annerusumik iliuuseqarnissaminnut kajumissuseqanngitsut paasivarput.

April-imi ineqarneq pillugu isumasioqatigiinnermi Partii Naleqqamiit naatsorsuutigisimagaluarparput, ajornartorsiutit qulaani eqqartorneqartut, qanoq iliornikkut piaartumik qaangerniarneqarnissaat ersarinnerusumik iliuuseqarfigniarneqassasut, kisianni taakku minnerpaamilluunniit eqqaaneqanngillat.

Partii Naleqqamiit aamma isumaqarpungut pisortat inissiaataannik aqutsineq nalilersoqqissaarneqartariaqartoq, tassami akuersaarneqarsinnaanngilaq ineqartunullu

akisuallaarujussuarluni pisortat ineqarnermut aqutsisoqarfiit A/S INI, Iserit, Illuut A/S-ilu tamarmik immikkut allaffissornikkut aningaasarpasuit atorlugit ingerlanneqarpata.

Iluoorsinnaanngilarmi utoqqaq 80-inik ukiulik inuiaqatigiinnilu sulilluareersimasoq, ataatsimik sinittarfilimmik ukiorpassuarni iluarsaanneqarsimannngitsumik najugalik, qaammammut 8.801,00 koruunik utoqqalinersiutinik tigusartagalik ineqarnermut ukiumut akiliutigisartagaasa naatsorsornerat qiviaraanni, tassa:

Ineqarnermut akiliut:	19.764,00
Erniat piginnittumut:	4.764,00
A/S INI-p ingerlatsineranut:	4.852,00
Kiassarnermut:	16.320,00
Imermut:	1.225,00
BPS-imut:	144,99
Innaallagissamut:	4.620,00

Illua-tungaatigulli tusaamavarput inuit pisoorsuit inissialiortiternermut pisortaniit aningaasanik ukiuni 20-ni erniaqanngitsunik akilersungassaannngitsunillu tapiiffigineqarlutik ineerannguanik ilinniartunut allanullu qaammammut 10.000 koruunit pallillugit akilersuisitsisut, ineqarnermut tapiissut (boligsikring) iluaqutsiullugu.

Illumut pissutsit taamaalersimappata inatsisiliornikkut iluarsisassat piaartumik iluarsineqarnissaat tamaviaaruttariaqarparput. Iluoorsinnaanngilarmi inuit pissakinnerit inigisaanniik aniatinnianguarlugillu, inuit pisoorsuit nammineerlutillu ikiliisinnaalluaraluartut inissialiornermut tapiiffigineqartassappata.

Aamma Partii Naleqqamiit sanaartornermut iluarsaassisarnernullu tunngatillugu, sanaartornermut akitsorsaaterpassuit pisariaqavissunngikkaluartut nalilersorluarneqarnissaat piumasaqaatingaarput, kiisalu ilinniartoqartarnermut piumasaqaatit sukaterneqarnissaat piumasaqaatigalugu, tassami

sulisitsisut pingaartumik maani nunaqavissut aamma ilinniartunik suli amerlanerusunik atuisinnaasut pisortat sanaartugassaataannik sulisinnerunissaat anguniartariaqarmat.

Minnerunngitsumik aamma Namminersorlutik Oqartussat suliffeqarfissuini sanaartugassanik suliariumannittussarsiuussisarnermi nakkutilliineq pitsaanerusariaqartoq Partii Naleqqamiit isumaqarpugut.

Tassami aserfallatsaaliinermut akissaqarnerulertoqarnaviangilaq maannakkutut pissutsit ingerlaannassappata.

Taamatut Partii Naleqqamiit oqallisissiamik siunnersuuteqartoq tunngaviatigut isumaqatigaarput.